

DELHI MIZO INKHAWM
BEIHRUAL ZIRLAI - 2013
THUPUI : KRISTIAN INKAIHHRUAINA
Ziaktu:Lalhmingthanga Ngente

A CHHUNGA THU AWMTE:

Zirlai	1-na	Thilpek
Zirlai	2-na	Pathian Thuzir
Zirlai	3-na	Thianghlimna
Zirlai	4-na	Inkhawm
Zirlai	5-na	Rinawmna
Zirlai	6-na	Chawlhni Serh
Zirlai	7-na	Mahni Intodelh (Taihmak)
Zirlai	8-na	Nupui Pasal zawn
Zirlai	9-na	Kristian Chhungkaw Din

THUHMA

Kum engemaw zah chhung chu Delhi Mizo Inkhawm hian Beihrial thlaah hian thupui thlansa siamin Bial leh Inkhawma hman tur a lo siam ta a ni. Delhi-ah hian Mizo awmte kan lo pung zel a. Inkhawm pathum awmin Bial pawh sawm lai kan lo awm ta der mai. Delhi Mizoten Pathian biakhona leh Delhi Mizo Inkhawm rawngbawlna leh hmalakna hrang hrang kan ngaipawimawh thin hi a lawmawm tak zet a ni. DMI member tinte hi Kohhran zia, Kristian nun, Pathian thu atanga inzirtirna tha neih hi DMI Committee chuan a duhsak em em a ni. Kum 2013-ah pawh hian hei hi hrerengin Beihrial Thupui atan Delhi Mizo Inkhawm Committee chuan 'Kristian Inkaihruaina' tih thupui a thlang a. Zirlai lo buatsaih a hma lo la turin Pu Lalhmingthanga Ngente chu ruat a ni. Hun chep tak karah a hun taka DMI-in kan hman theih tura a rawn buatsaih theih avangin DMI Committee chuan lawmthu a sawi a ni.

Beihrial thupui hi Bial Inkhawm leh Pathianni inkhawm a hman turin felfai tak leh zirchakawm takin a rawn chhawp chuak a, sawihona thupui pawh a rawn ruahman sa vek bawk a ni. Zirlai ziaktu hian a bul thum atanga tanin, tawi fel tak siin nitin nuna tangkaipui theih tur a rawn chhawp chhuak a ni. Kumin Beihrial Thupui hi zirtuten thahnemngai tak leh tih tak zeta kan zir chuan tisa leh tharau lam nunah hlawkna thar kan chhar chhuah ngei i beisei tlat ang u. Setana hian nasa takin ringtute min bei a, Kan doral hi kan hneh ngei theihna turin he Beihrial Bu hi tangkai taka hman i tum theuh ang u. He zirlai zirtu zawnng zawnngten Pathian inpuanna in dawn thar theuh kan duhsak a che u. Lalpan malsawmin hruai zel che u rawh se.

Delhi Mizo Inkhawm

ZIRLAI 1-NA – THILPEK

1 September 2013(Pathianni)

'Thilpek chu zawnng ka ni lova; rah nangmahni lama pung tur chuzawnng ka ni zawk e.' (Phil 4:17)

Mizo thufingah chuan, 'lak aiin pekin lukhawng a nei zawk,' tih a ni. Pek tur neilo dinhmun aiin pek tur nei dinhmun a duh awm zawk. Kan nitin khawsaknaah leh inthenawm khawvennaa thil kan inpek tawn liam liamte, bai insuah fahrante pawh hian inlaichinna tha a siam a, mihring min tipumkhat a ni. Mi thil phalte nun chu awhawm tak a ni.

Kan zirlai thupui atan **Thilpek** kan tih hian umzui deuh bik kan nei dawn a. Chu chu Pathian hnena thilpek a ni. Delhi a Mizo awm, DMI memberte zingah thilpek lam kawnga thahnemngai tak takte rawngbawlna hmuh leh hriat tur kan nei nual mai. A kai rual chiah lo nain kan theih ang tawkah chuan thilpekah thahnem kan ngai tlang viauvin a hriata, tan lak deuh ngaite pawh kan la awm awm e..

Engvangin nge kan pek ang:

Engvangberin nge thilpek hi kan pek tih hi han inzawt ta ila, kan chhanna chu a thuhmun chiahlo mai thei. Mi thilpek duhna kan neih a, kan pekte chu engemaw tizawng taka kan duhsak leh inzawmna kan neihpuite an ni tlangpui. Tanpui an ngaih avanga kan pekte pawh an awm bawk. Kan duhsakna leh hmangaihna lantirna a ni. Pathian hnena thilpek kan pek pawh hi amah kan hmangaihzia leh a rawngbawlhna kan ngaihpawimawhzia tih lanna a ni. Luka 6:38-ah chuan amah kan Lalpan, 'pe rawh u, chutichuan pekin in awm ang, thahnemngai taka teh a, bengmuka, sawimuk a, liam zawih zawihin in mal chungah an pe ang che u. In tehna ngai bawkin an tehsak dawn si che u a,' min ti a ni. Lak ai chuan pek chuan lukhawng a nei dawn chu a ang khawp mai

Thilpek chungchangah Thuthlunglui lamah pawh kaihhruaina mumal tak, awmze nei tak kan hmuh chu petute hian an hloh lova, an pek avangin an tlakran phah lova, chu a hnehin malsawmna thuah tam tak a vur let Lalpan a tiam zawk a ni. Malakia 3:6-11 ah chuan van tukverh hawnga, a laka mi inphalte chhanlet chu Lalpa thil tum a nih thu kan hmu. Hmuh let leh beisei nei rana pek tumna rilru erawh chu a dik chiah lo mai thei. 'Amahin min hmangaih hmasak avangin ka hmangaih a ni', tih angin, hmangaih avanga kan insensona chu phutlet, peklet beiseina awmla a ni. Amah hmangaiha, a rawngbawlna leh mi harsa zawkte chhawmdawlna atana thilpek petute chungah Pathian rinawmna chu nasa tak a ni. Tumah a tithlawn ngai lo.

Kohhran takin kan pe ang:

Kohhran takin Pathian hnenah thilpek kan pe tur a ni. Tirhkoh Puala chuan thilpek chungchanga mite a fuihin, 'Thilpek chu zawng ka ni lova, rah, nangmahni lama lo pung tur chu zawng ka ni zawk e,' tiin a sawi (Phil 4:17) DMI memberte pawh hian helam kawngah hian thahnemngaih chhuah thar zel ila. Committee-in a hmuhna leh hmanna tur tlangpui a ngaihtuah ang zul zuia thilpek kan pek thin a tha. Thawhlawm ip column thenkhat tiawl a, thenkhata thawh lawih maite pawh hi a awl khawp mai. Kan tuina leh thahnem kan ngaihna zawn kha a awm a nih pawhin thawhlawm ipa a head hrang hrangte hi hmaih bik awmlovin tlem tal chu kan thun thin tur a ni. A dang ang thova Committee-in hmuh leh hmanna tur awma a ruahman a ni tih kan hre reng tur a ni.

Thilpek rawngbawlna hi mitin tana telve theihna remchang a ni. Thu ka sawi ve thiam lovin ka zai ngailo pawh a ni thei e. Mahni hna lamah kan buaiin rawngbawlnan tha kan thawh ve hman lo a nih pawhin, thilpek rawngbawlna kawng hi chu kan tan a inhawng reng a, kan ti ve thei a ni. Mitin tana remchang rawngbawlna hna peng pawimawh tak a ni.

Lawm chungah pek:

Thilpek kan pek hian lawm chungah pek thin tur a ni. Rawngbawlna thilah ngat phei chuan ui chungah pe lovin, phal taka pek tur a ni. Thil kan pek hian midangte mamawh kan phuhruk mai a ni lova. Pathian hnena lawmthu sawina nunah mi kan hruai thleng thei a ni tih Paula chuan min hrih.(IIKor 9:7-15). Thilpek chungchang kan sawi hian a awmsa atanga pek hi mi tam berin kan tih dan a ni a. Rinna thilpek(faith promise) kaltlanga pek phei chuan a petu tisa leh thlarau lam nunah hausakna a pe a. Pathian rinchhana nun dan a zirtir thei a ni. Pathian tan pe turin i inbuatsaih zel thei ang em le? Pathian chuan kan soal tlan nan a fapa meuh pawh ui lovin min pe a. A thilpek sawi hleihtheihloh avang hian Pathian hnenah lawmthu awm rawh se.

Ka hmangaih theihna zawng hi, I ke bulah leih ka duh.

Ka ta zawng zawng pek ka duh, Keimah nen nei tlat ang che.

Sawiho atan

1. Awmla atanga pek tih hi a dik thei dawn em ni? He lam kawnga kan tawnhriat(experience) atangin i sawi ho ang u.

2. Lak aiin pekin lukhawng a nei tih hi zau takin han sawiho teh u.

(Bible chhiar tur: Malakia 3:6-11; II Kor 9:6-15; Luka 6:38)

ZIRLAI- 2NA- PATHIAN THU ZIR

7 September 2013 (Inrinni)

'I thu hi ka ke atante hian khawnvar a ni a, Ka kawng atan eng a ni.' (Sam 119:105)

Kristian Inkaihruaina tih thupui hnuai 'Pathian Thu zir' tih kan telh hian kristian tawh phawt chuan Pathian thu a zir tur a ni, tih bur lam a kaw lova. Lehlamah erawh chuan kristiante chu kan sakhaw lehkhabu, Bible leh a zirtirrate, a taw a fang chu hre tura beisei leh inkaihuai thin kan ni.

DMI memberte zingah, Pathian rawngbawl tura thutlukna siam tawh, thawk mek leh inbuatsaih mekte zingah hian Pathian thu zir tura kohna dawng si, zir ta emaw zir ta lemlo emaw kan awm em aw. Pathian Thu zirna hmun theological college/seminary-ahte lutin mumal taka a chinchhuaka Pathian Thu zirlo kan ni deuh vek awm e. Bible, Pathian thutak puanchhuahna hi hria a, hria darh zel tur kan nih avangin kristian tinte hian kan theih ang tawka Bible kawmgeiha, chhiar fova, zir a, a thuchah hre tura kan khalh ngun deuh chu a ngai a ni. Rinna a ral beihna hmanrua, thlarau ngunnam, Pathian thu hi kan hman tur mai bakah midangte pekchhawn tham kan kaw theuh a tul a ni.

DMI hian rawngbawl na kawnga hma a lakchhoh zel a, hnamdang ringlo mite hnena a rawngbawl na mai bakah keimahnih zingah pawh rawngbawl na rusum thlaka, beihpui a'n siam meuh chuan Pathianin mal a sawm a. Mithar, ringthar, hmuthar kan lo awm zel a. Chunggho zingah chang pawh ni lovin, nei awm taka ngaihte pawhin Bible hi an lo kaw mang hlek lo mai a. Mahni sakhaw lehkhabu pawh kawlo, a zir chu sawiloh, chhiar leh ngaihtla ngai reng renglote pawh Kristian ni siin a lo awm theih reng mai dawn a lo ni. Aelfric-a chuan, 'kan tawngtai hian Pathian kan bia a, Bible kan chhiar hian Pathianin min bia a ni,' a ti. Bible kan chhiar ngai em le?

Pathian thu bihchian hlawkna leh tangkaina tel pha khawpin Bible hi kawmgeih ila. Kan nun kawng, kal harsa takah hian nun hruaitu atan i hmang ve ang u. Sam ziaktu chuan, 'I thu hi ka ke atante hian khawnvar a ni a, ka kawng atan eng a ni' a ti. (Sam 119:105) Kal ngaihna kan hriatloh lai pawhin kalna tur kawngtha min kaw hmuh a. Kan daisual lohnana eng min petu a nih avangin Pathian Thu hi kan zir chiangin kan hmang tangkai tur a ni. Kan thu hriat leh dawnte, ei nuam kan tihzawng thusawi leh zirtirna hrang hrangte pawh hi Bible zirtirna lai lum luahtu a ni em tih enfiah a, chhut ngun fo tur a ni. T.T 17:10-12 kan en chuan Beroia khua a mite chuan Pathian thu mi sawi an ngaihtlakte chu a dik em tih fiah nan Bible-ah an zawng thin a ni tih kan hmu.

Mi thenkhat chuan, 'Pathian thu hriat a zawm siloh chu engmah a nilo,' te an ti thin. Ni e, kan hria anga, kan zawm baw ang. Pathian Thu thiltihtheihna pholang thei turin zirchian deuh chu kan mamawh theuh. Hebrai ziaktu chuan, Pathian Thu hi a nung a, thil a ti thei a, khandaih hriam tawn eng ang aipawhin a hriam a, nunna leh thlarau rutuah leh thling phel hrang khawp hialin a chhun thei a, thinlunga ngaihtuah leh tumte hi a hre nghal thei a ni, (Heb 4:12) a ti. Pathian thu chu kan nunna, kan chakna, kan dam nan kan hmang ve duh ang em aw!

Tunlaiin DMI member, mi engemaw zatin thahnemngai takin Pathian Thu bihchiangin Bible Study Group pawh hmun engemaw zatah kan nei thei a, a lawm awm tak zet a ni. Hengahte pawh hian mahni tui zawnga kalpui chin awm mahse, a theih chen chenah chik takin zir tum ila. A ziaktu, eng hun leh hmuna zia nge, engdinhmuna ding mekte tana ziah nge, keini tan thuchah (message) enge a ken tihte ngaihtuahin, tunlai mite tana a relevant-na laite zirchhuah kan tum tur a ni. Francis de Sales-a chuan, 'Bible hi fin nan chhiar la, in humhim nan ring la, thianghlim nan nunpui rawh,' a ti.

Hun pum rawngbawl na neih tum, chumi atana inbuatsaih theite tan phei chuan mumal zawk a Pathian Thu zir hmasak a, hriat ve taw chin nei chung rawngbawl tura thawh chhuah chu bul tan dan tha tak a ni ang.

Zanah khawnvar eng angin, I thuin rilru a en ;

Rotha aiin a hlu em e, thinlungah ka vawng ang.

Sawizui turte

1. 'Pathian Thu hi rinna leh thiltih tehna diklo theilo a ni' tih hi han sawizau teh u.
2. Pathian Thu hre mumal lo tan rahchhuah rawngbawl na a neih theih tho ang em?
3. Bible kan chhiar hian Pathian aw kan hre ngai em?
4. Beroia khuaa miten an hnena Pathian thu sawi an hriatte, a dik leh dikloh hriatnan Bible tehfunga an hmang ang hian tunlaih hman ve a tul kan ti em?

5. Pathian thu hi hriat tur nge zawm tur?
6. Pathian thu thiltitheihna kan tawn hriat (experience) atangin i sawiho ang u.
7. Nitin nuna Pathian thu hman tangkai dan sawiho nise.
(Bible chhiar tur: Sam 119:105; T.T 17:10-12; Heb 4:12)

ZIRLAI- 3-NA :THIANGHLIMNA.
8 September 2013 (Pathianni)

“A kotu che u a thianghlim angin nangni pawh in chetzia zawng zawngah lo thianghlim zawk rawh u. Nangni inthianghlim tur a ni, Kei ka thianghlim si a.”(IPet 1:15,16)

Fai hi Pathian anna a ni (Cleanliness is next to Godliness) an ti a. Thianghlim tur chuan engthil pawh a fai a ngai a ni. Thianghlim chu enge ni? Hlang, fir, engmah pawlhloh hi a nihnaah chuan a thianghlim phawt a. Thil a fai hlarh chuan a thianghlim thawkhata ngaih a ni. Mit lawng a kan hmuh theihloh thil tetham te te bawlhhlawh leh min tina thei natna hrik tam tak erawh a awm tho bawk.

Kristian Inkhaihruaina tih thupui hnuai **thianghlimna** tih kan sawi dawn erawh chuan a chung a kan sawite bakah ringtu nuna thianghlimna chuan awmze hran a keng tel a. Danglam, langsar chiang, tle, hrang tih lam a kawka hman a ni. Mizoramah chuan Biak In chu building dang lak atangin hriat hran a awl hle a. Chutiangin ringtu chu a a awmna hmun apiangah khawvel mite lak atangin a tha zawnga danglamna lantira, thliarhran theiha a awm hian, ringtu nuna **thianghlimna** chu amahah chuan hmuh theihin a awm a lo ni. Chu chu hlen chhuak tura inkaihruai leh inzirtir chu he kan zirlai hian a tum a ni. Kristiante hian tisa lama fai leh thianghlimna kawngah pawh tan lakna tur kan nei.

Taksa vawn thianghlim: Mihring hmasawanna than dan a zir zelin kan chenna in leh lote a lo faiin kan taksa ngei pawh kan lo vawngfai deuh deuh zel a. Ringtu chu a in vawngfai reng tur a ni. Chu chuan taksa leh thlarau hriselna pawh a kengtel thei a ni.

Silhfen vawn fai: Hnamchang kang apiang an fai tih hi a dikna thui tak a awm. Ringtu chuan mahni in leh lote, chenna hmun leh silhfente, ei leh in thil leh a siamna hmun leh hmanruate fai leh fel taka vawngin kan enkawl fo tur a ni.

Ei leh in a thianghlimna: Hnam hrang leh awmna hmun hranga lo zi chhuak chu kan ei leh in duhzawng leh ei in dante pawh a hrang deuh zel a. Tui kan tih zawng takte pawh thenkhat tan tenawm a ni thei. Kristiante chu midang la ringlo leh hrelote hnenah chanchintha hrila puang zel tur kan ni a. Kan rawngbawl na dal thei tur zuk leh hmuam, ei in leh silhfen inbelachte pawh kan fimkhur thin tur a ni. IKor 10:31- ah chuan ‘Chitichuan in ei pawhin, in in pawhin, in tih apiangah pawh, Pathian ropuina tur hlin in rawh u’, a ti a. Pathian ropuina tur kan ngaihtuah ran a nih chuan ei leh in zuk leh hmuam thua thil fello lo awm thinte pawh hi kan pumpelh mai dawn a lo ni. He lam kawngah hian kan la fihlimlo hle a nih chuan rinna a thianghlimna kawngah zir tur kan la nei a ni tih i hria ang u.

Nun thianghlimna: Thianghlimna thu-ah hian thlarau lam nun chauh ni lovin kan nun pumpui hi a thianghlim tur a ni. ITheso 5:23 ah chuan, ‘remna Pathian ngei chuan in pumin tithianghlim che u rawh se; tin, in thlarau leh, in rilru leh, in taksa chu kan Lalpa Isua lokal hunah chuan sawiselbovin apuma humhmin awm rawh se,’ a ti a ni. Rilru, taksa leh thlarau nun pumpui thianghlimna chu kan Lalpan sengkawm a duh avangin a lokal leh thlenga humhim a tul thu min hrih a ni. Thianghlimna kawnga nun serhhran thua chuan Gal 6:17 –ah Tirhkoh Paula chuan, a taksaah Isua chhinchhiaha a put tawh avangin tuman tibuai tawh lo tura a duh thu a sawi hmak mai. Chu chu Krista anna a puitlin leh thianghlim zelna atana a duh dan chu a ni. Hruaitu ropui Mosia kaltlanga Pathianin a hnamthlan Israelte hnena a chah chu, ‘In thianghlim tur a ni: kei Lalpa in Pathian hi ka thianghlim si a,’ (Lev 19:2) tih hi a ni.

Kan Lal Isua’n tlang chung a thusawiah khan, ‘Thinlunga thianghlimte chu an eng a thawl e, Pathian an la hmu dawn si a,’ a ti. (Mat 5:8). Rinna kawnga kan thianghlimna tur chuan pawnlam lang theiah pawh insumna tur tam tak a awm. Ei leh in, zuk leh hmuam lamah te tihthan thalo bansan thua te mipat hmeichhiatna hman khawloh thu-ah te inthiarfihlimin ringtu chu hriat hran theihin kan lang ngam tur a

ni. Kan taksa hi mana lei, thlarau thianghlim in a ni a. Chu mi vawn thianghlim chu kan mawhphurhna a ni a, kan bat a ni. Tirhkoh Paula chuan Rom 12:1-ah chuan, inthawina nung leh thianghlim leh Pathian lawmtlak ni tura taksa hlan turin min ngen bawk a ni.

Greek tawng thu pakhat '*Hagios*' an tih chu English-in '*Holy*' ti a lehlin a ni a. A awmzia chu thildang laka hrang, hlang, pawlh dalloh sawi nan an hmanga. Chu chu kan zirlai thupui 'thianghlimna' tih sawi fiahnan an hmang thin. Ringtu chu khawvel mite nun laka hrang, hriat hran theiha a awm hian, Pathian duhzawnga inserh thianghlimna chu a nunah hmuh theihin a lo langchhuak thin. Chumi nun chu keini hian kan pholang ve ngam ang em. Kristian ka ni a, hei chu ka tih ve a rem love, i ti phal dawn em. Thu lawilo sawi mai maite Kohhran ngaiha thil thianghlimlo khawih leh tihte sim tur kan nei a nih chuan sim ila. Kan zirlai hi keimahniah a hlawhtling dawn a ni.

Sawihotur te

1.Hmuhtheih lama thianghlimna hian chhungril lam nun thianghlimna a pe thei ang em?

2.Thianghlimna nun kawng zawh turin engah tenge tan kan lak a ang han thawhkhawm teh u.

(Bible chhiar tur: IKor 3:16-17; ITheso 5:23; Matt 5:8; Gal 6:17;Rom12:1)

ZIRLAI -4-NA: INKHAWM

14 September 2013 (Inrinni)

'Thenkhat tihdan anga kan inkhawmte bansan lovin i infuih tawn zawk ang u.'(Heb 10:25)

Kristianten Pathian kan rinna tihngheh leh hmasawn nana kan inkaihhraina pawimawh tak chu Inkhawm hi a ni. Inkhawm kan tih hian Biak In-ah chauh ni lovin, mimal in , Hall leh hmundang remchanga mumal taka Pathian fak leh chawimawina, inpawlhona kan neih thin ang hi a ni.

Inkhawm programme chu a chang kangin a felfai em tih leh kan inkhawmna hmun ropui leh ropuiloh lamte chu kan zirchhuah tumber a ni lo. Ringtu chu a huhova inpawlkhawmna, thu leh hla a inchawm tawna leh a huhova Pathian biaknaah telin, tisa leh thlarau lama hlawkna dawng turin a inbuatsaih thin tur a ni. Ringtu ni si, a huhova inpawlkhawmnaa tel ngailo mi chu a nun a tam lovin, huho nunah mi tangkai tak a ni ngai lovang.

Thenkhat chuan inkhawm a ngai chuanglo, inrawn banga kan inang leh vek, inkhawm pawh in tha chuanglo te an ti thin. Heb 10:25-ah chuan, 'thenkhat tihdan anga kan inkhawmte bansan lovin i infuih tawn zawk ang u', a ti a. Amah kan Lalpa ngei pawhin Pathian Biak In a kal chu a ngai pawimawh a. Tumkhat a nu leh pain an zawn tum pawhin,' engahnge min zawn, ka pa In a ka awm tur in hrelo em ni?' tiin a lo chhang a ni.(Luka 2:49)

Delhi-a mizo awmte hi kan tul tlang viau nain, inkhawmna hun kan neih ang chhunte kan ngai pawimawh a. Inkhawm pawh a nuamin kan hlawkpui viau thin a. A huhova hmun 3-a kan inkhawmna bakah bial hrang hranga kan inkhawm pawh kan hlawkpui leh zual theihnan tan kan lak chhonzawm zel a ngai a ni. DMI Bial inkhawm kaihhraina 10.4.4-ah chuan. 'Biala inkhawmna reng reng Pathian biak inkhawmna a nih anga puithu leh tih tak zet a Pathian thu hril leh inzirtir, Pathian faka zaiho, tawngtai, chanchintha rawngbawlna leh thiltha tih lama tan lak,' tih tarlan a ni a. Veng/Bial inkhawmte pawh hi puithu leh uluk taka kalpui a tulzia hriain DMI Committee chuan hetiang ruahmanna hi a siam a ni. Hmunkhata inkhawmho chuan in unauna kawngte, rinna leh nitin khawsak phunga thanlennate inhmelhriat tawna thate a pe theia. T.T 2: 42-47-ah pawh chumi nunzia chu ringtu hmasa ten min lo hnuchhiah tawh a ni tih kan hmu.

Khawvel lam thila inhmukhawm leh Pathian bia a inkhawm hi chu a dang a. Pathian be tura kan kal chuan kan silhfen inthumna, rilru sukthlek zawng leh chet dante pawh uluk zawk a kalpui a tul thin. Pathian Biak In a kan inthumna silhfente chu bul leh pan lutuk lo ni thei se. Mahni lamah fihlim mah ila, mi dangte rilru leh ngaituahna hruaikawi thei tur zawng silhfen inbel loh hram kan tum a tha. Johana 4:24-ah chuan 'Pathian chu Thlarau a ni; a chibai buku ten thlarau leh tih tak zet in chibai buk an tur a ni,' tiin min hrilh a ni.

Chutih rualin invawn up lutuk pawh a tha chuanglo. Midang thusawiah emaw hun neituah emaw inngat mai lovin, mahniin kan theih anga sang leh ropuia Pathian chibai bukna hlan a, mahni intheihnghilha Pathian chawimawi kan tum tur a ni. Thutluh tawh hnuaw hawikual leh veisek te a theih chen chenah pumpelh tum tur a ni. Inkhawm hlawhtlinna kha midang hun hmanthatah chauh nghtat lovin, mahni lam inhlanna pawh a pawimawh tel tih kan hre reng tur a ni.

Inkhawm chu inhmuhkawmna satliah, bialnu bialpa leh thian tha, chhungkhat laina inhmuh remchanna ang leh inchei chung a va in show-off-na ang vel leka kan ngaih chuan a tawh lovang. Kan thlarau nun lam chak lak nan kan hmang tur a ni. Inkhawm tura kal ve si pawna awm tlingtlak fote pawh hi a fel chiah lo. Thilpek lakhawma buaipuitute pawhin kan tihfel zawhah Pathian Biak Inkhawm service kha zawm leh nghtat vat kan tum tur a ni. Thuzir leh thuhiril ngaihthlak hi kan ngaipawimawh tur a ni.

Pathian biakna hmuna kal chu tisa leh thlarau lam nun chau tan chawlhna a nih theih avangin Sam ziaktu chuan, "I biak In hungchung kawt laia nikhat awm hi, ni sangkhat aiin a tha zawk si a,. Suahsualna puan intea awm ai chuan, kan Pathian ina kawngkhar vengtu nih pawh ka duh zawk a ni." 'I ina awmte chu an eng a thawl e, nang chu an fak fo ang che.'" a ti hial a ni.(Sam 84:4&10). Kan nunna hian Pathian Biak In hungchung kawtlaite chu lo ngai zual ve deuh deuh sela. Amah faka kan inkhawm thinna chuan kan mimal nun, chungkua leh khawtlang, ram leh hnam nun hi siamthain khalh ngil mawlh rawh se. Sawizui turte

- 1.Inkhawm hi awm ta lo se, khawvel Kristiante nun hi engtingge awma in rin?
- 2.Inkhawmnaah hian hlawkna chharchhuak turin Biak In, Programme leh inkhawma te zingah enge pawimawh bera i rin?
- 3.DMI a kan boruak thlir hian inkhawm rei zawng hi a tawh kan ti em?
- 4.DMI bial Inkhawm hi tun aia hlawkzawh leh tangkai zawka tihchangtlun dan a awm ang em?
- 5.Delhi-ah hian kar a hlaa, inkhawmte hi a senso thlak thin hle a. Mahse sim a hnekin kan uar zel si a, enge a chhan? Inkhawm hlawkna han sawiho teh u.
- 6.Inkhawmnaah hian engti turin ge kan kal ve thin? Zai emaw thuhiril emawte hi awm dawnlo ta se i inkhawm tho ang em?
- 7.DMI emaw hmun dangah pawh mizo kristiante inkhawmnaa incheina chungchangah enge sawi tul ni a kan hriatte sawiho nise.

(Bible chhiar tur: Luka 2:49; TT 2:42-47; Sam 84 :1-10)

ZIRLAI – 5-NA : RINAWMNA.

15 September 2013 (Pathianni)

'He ramah hian awm la, rinawmna um zel rawh.' (Sam 37:3)

Rinawmna tih hi hrilhfiah dawn ila, a harsa viau mai thei. Rinawmna hi a mal din ngawt thei lova. Thil pahnih emaw a aia tam lakah emaw rinawmna kan tih hian a nihna a tarlang thin. Rinawmna chuan mahni himna leh lawmna ringawt a zawng lova. Rinawmna nunze dik tak a bul hnaia awm hnenah a lantir thin a ni.

Kristian nunah chauh nilovin, rinawmna chu Pathian ringlomite nunah pawh hmuhtheihin a awm. Kan thupuia rinawmna tih kan zirhova, umzui kan duhdan erawh chu rinawmna chuan tisa lam thil chauh ni lovin, tun damchung leh thihhnu piah lama ringtu thlarau khawvel dinhmun a la hril dawn avangin, Pathian leh kan mihringpuite laka rinawm taka nun hman zel chu a ni.

Gen 7:1 kan en chuan Pathian mi Nova, Lalpa laka a rinawmna chuan amah leh a chhungte leh a damrualpui ran, ramsa leh nungcha dangte a chhandam. Khawi lam hawia chhuah ngawt mai tur nge tih pawh hrelowa, amah kotu thupek laka a rinawmna avangin Abrama chu malsawmin a awm. A thlahte chhuan tam tak thlengin malsawmin an awm. Amahah chuan leia hnamtinin thawvanna an hmu. Pathianin min tiam ram luah thei tur hian a laka kan rinawmna hian engchen nge kan nun a thu nun ve anga, eng ang nun hausakna nge mi dangte kan hnuchhiah ve ang aw.

Rinawmna chungchang kan zir hian sawilan tel hram kan duh chu mahni hnaa rinawm hi a ni. Zirlai chuan a zirlai a tlawmsana, a rinawmloh san chuan a hlawhtling ngai lovang. Mahni thawhtheih tawk hna kan zahpui tur a ni lo. Eng hna pawh thawk ila, chu hna chu Pathian leh kan mihring puite rawng kan bawl na a ni tih hriain, taima takin hlawhtling tlakin kan thawk mai tur a ni. Ram rawngbawltu pawhin rinawm takin ram tan a thawk mai tur a ni. Ram leh hnam chawikanna tura sawrkar sum leh pai enkawl thuah pawh hian huaisen leh dik taka thawktu, a tul a nih chuan rorelna thutphah pawh chan huam mi kan ramin a mamawh a ni.

Sam 37:3-ah chuan Sam ziak tu'n, ' he ramah hian awm la, rinawmna um zel rawh. Lalpa chungah chuan lawm bawh rawh, tichuan i thinlung duhzawngte chu a pe ang che,' a ti a. Vawiinah hian engemaw kan thinlung duhzawng chu ni ta le? Enge kan chakkhai leh engto ber chu ni ta? Mi pamham leh thil thalo titute nun leh thiltih avang chuan kan lungngai mai tur em ni.? Hnai love. Kan mamawh nia kan ngaihte kan neih a, kan chen theihna tur chuan Lalpa chungah lawma, a laka rinawm chu a ni. Engtin chiah nge a tih kha. 'Trust in the Lord and do good. Dwell in the land and feed on His faithfulness.' Amaha beiseina nung nghata, a rawngbawh hna thawkin, chumi hmuna tam tala, a khawngaihna kang ngailo ringa inhnangfak turin min duh a ni. A lakah chuan kan rinawm ve thei mai angem aw!

Ringtu tam tak chuan a malsawmna hmun atang chuan a tana rinawmna lantir chu kan thei a ni mahna. Mahni leh chhengkaw tana tlakranna tur hial pawh nise, atana kan rinawm avanga mahni level puite phakloh kumkhua turte, chenna in ropui leh lirthei chhuakthar ber berte neihve phaklohna tur pawh nise. Atana rinawm tlang ngam tur Lalpan a zawng a ni. Hmanah Daniela chuan a chan tur chu sakeibaknei koham puk a ni dawn tih hre reng mahse, a rinchhan Lalpa tana a tundin maicham chu a chim lo.(Daniel 6:10) Chu maicham a tundin avang chuan sakeibaknei puk chu a thleng ngei taka, nimahse a laka rinawmte lakah Lalpan a tih tur a haihchham lova, a reifel hmaih lo. Rinnain ramte an la a, mei thiltihtheihna an ti mit a, khandaih hriam lam an pum pelh. A nuam leh him chin mai ni lovin, 'thih thlengin rinawmin lo awm rawh, tichuan nunna lallukhum ka pe ang che,' min ti a nih kha. (Thup 2:10)

Ringtu chu tihduhdahna hmunah pawh a rin Lalpa tan a rinawm tlang ngam tur a ni. Hausak leh retheihna hmun atang pawha Lalpa tana rinawm a, amah nghah veng veng chu kan duhsam lo ni rawh se.

Ringlo mite pawhin an hmuh theih khawpa i rinawmna chu a hun tak zelah i pholan ngam chuan, tlai ngailo Pathian rinawmna chu amah ringtute tan, tunah leh chatuan thleng pawha a kang dawnloh avangin, i mamawh hunah i lam hawia a zahngaihna ban phar chu tihtawiin a awm lovang.

Rinawm leh fel taka awmin, nitin rawng i bawl tlat ang.

A

ropuina chang ve turin, damchung hian i bei zel ang.

Sawihoh turte:

1. Tunlai ringtu nunah hian englakahte nge rinawmna lantir pawimawh han sawihoh teh u.

2. Rinawmna hian rah nei ta sela, chung chu engtente ni a in rin?

(Bible chhiar tur:Thup 2:10; Gen 7:1 & 12:1-3; Daniela 6:10-23)

ZIRLAI- 6-NA : CHAWLHNI SERH

21 September 2013 (Inrinni)

'Chawlhni hi thianghlum taka serh tur a ni tih hre reng rawh.' (Exo 20:8)

Chawlhni (Pathianni) serh chungchang kawvel kristianten kan kalpui dan hi a inanglo nual mai. A tlangpuiin Mizo kristiante hian Chawlhni hi kan serh tha thawkhat viau mai. Hmanlai deuh leh tunlaia chawlhni serh kan ngaih pawimawh dan erawh chu a dang tan ta. Kan khawsak phungin a ken tel tak vangte pawh a ni mai thei a. Pathian ni serh kawngah hian kan tlahniam deuh ta zel nite pawhin a sawi theih awm e.

Delhi-ah hian Chawlhnia bazar kal a, tih takzet a shopping nana hmangte pawh hi awm theih tak a ni. Thenkhat chuan Pathian ni zing hun thate hi amah pawl nana hmang lova, rukru bazaar an tih thil ruk khawm emaw ni an zawrh lei tura rawngbawltu, zing kal ta nal nal pawh kan awm nual awm e. Kan ti ve

thin emaw.? An thil zawrh a tha emaw a man tlawm deuh pawh nise, a then chu ruk khawm an zawrh a ni, an ti a. Ringtuten chawlhni serhloh phahnan chuan hmanglo thei ila, a duhawm hle..

Chawlhni serh chungchang Biblein min zirtir dan leh khawvel hmun hran hrana kristian pawl hrang hrang leh mi malin kan serh dan chu kan um zui seng lovanga. DMI mipuite hian chawlhni hi engtiang chiahin nge kan lo serh tawh thin a. Engtia kalpui zel nge kan duh tih hi zirho tum ila. Sawizui tur lamah hian thahnemngai takin mahni ngaihndan leh vei zawngte sawichhuak turin inbuatsaih ila, kan zirlai hi kan hlawkpui theiin a rinawm.

Exodus 20 :8-11-ah chuan chawlhni serh chung changa a miten an tih dan tur Mosia kaltlanga Pathianin a mite hnena a pek chu, Chawlhni thianghlim taka serh a ni. Lalpan niruk chhungin lei leh van leh a chhunga thil awm zawng zawngte a siama. A ni sarihna chu serhin a chawl ta a. Mal a sawm bawka. Hei hi thuthlunglui hun lamah chuan an ngai pawimawhin an la urhsun hle a ni. Chawlhderna ni atan an hmang thin. Zing nichhuah atanga tlai nitlak thlengin chaw pawh an ei ngailo. He niah hian mahni kawng zawh lova mahni nawmsak bawl nana hmang lova, mahni thu sawilova serhte chu Jakoba rochun thiltha a chawm Lalpan a tiam hial reng a ni. (Isai 58:13-14) Hei hi a ni zawnga kan sawi chuan Sabbath serh chungchang sawina a ni.

Thuthlungthar hunah erawh chuan chawlhni chu chawlh derna atan chauh mai a hmang lovin, thil tangkai tihnan kan Lalpa ngei pawhin a rawn hmang zui a. Hun a lokal zel a, Sabbath serhna thil lung chu Kros kal tlanga Krista hnathawh chuan rawn thiatin Sabbath aiah Sunday(Pathianni) kan lo serh ta a. Krista thihna hneha a thawhlehi a nih avangin Kristianten kan ngai pawimawhin kan ngaihlu ta zawk a. Khawvelah hian Kristiante chauh lo pawhin Sunday(Pathianni) chu ngaih pawimawh a hlawh a. India ramah pawh hian sawrkar Pisa leh sikul etc te pawh khar vek a ni. Chutiang taka Sawrkar lam pawhin a ngaih pawimawh chawlhniah hian Kristian berte hi engtiang taka he ni hi serh leh hmang tangkai tur nge kan nih tih hi ngaituahfo a tul reng a ni. A ni serh thianghlima, amah be tura inkhawmte, a thuhiril nguntaka ngaihlak leh a malsawmna kan dawn ang zel a peklet ve lehna hun atante, a duhzawng thildang zir leh sawi nante kan hmang thei a ni.

Mizo Kristian nunphung pangangaia awmte chuan vawiin thleng hian Pathian ni a hnathawhte, tul pawimawh dang tih leh zinchiuah nana chawlhni hmante hi an la hrehin an zah a, an serh tlat thin. Zirna leh thiamthil dang in examna atana Pathianni lohtheihlohva hman tul changte, hnasang zawk thawk tura exam beih ni atan kan hmang a nih pawhin zah takin Pathian pawlna nung nei chungin i serh thin ang u. Kan Zosap Missionary-te zinga mi Pu Zosaphthara chuan, 'Niruk chhungin hna kan thawk thei, chawlhni amah biaknan a ni,'(KHB-561) tiin chawlhni serh a ngaih pawimawh thu chu hlain a lo dah hial a ni.

Hmuhtheih lam leh langthei rawngbawlina lam chauh ni lovin eng hna pawh thawkin khawi hmunah pawh awm ila, thlarau leh tih tak zetin mahni pawihai dah thain Lalpa ni hi i serh thin ang u. Hebrai lehkhathawn ziaktu chuan, Pathian mite tan chuan chawlhnia chawlhna a la awm ta fova. Chu chawlhna a lut a chawl tur chuan thahnem i ngai ang u, tiin min sawm a ni.(Heb 4:9-11)

Sawizui turte

- 1.Tunlai hunah hian chawlhni hi engtia serh nge tha bera kan rin?
- 2.Pathian mi ni si chawlhni serh ngaisanglo a awm theih ang em?
- 3.Chawlhnia lei leh hralh thu-ah hian in-sum-kar deuh ngaiin kan hria em?
- 4.Sawrkarin holiday-a a puan Sunday (Pathianni) a lo thlen hian enge kan rilruah lo lang a, engtia hman nge kan tum thin?
- 5.Rev Edwin Rowland-a'n 'Niruk chhungin hna kan thawk thei; Chawlhni amah biak nan ani'(KHB-561) a tih hi tunlai hunah hian la relevant rengin kan hria em?
- 6.Chawlhni malsawmna nia kan hriatte sawiho ni se.

(Bible chhiar tur: Exo 20: 8-11; Isai 58: 13,14; Heb 4:9-11; Luka 6:9)

ZIRLAI -7NA : MAHNI INTODELH(Taihmak)

22 September 2013 (Pathianni)

'Mut thlahlel suh, i lo pachhe dah ang e; I mit meng la, tichuan chhang khamkhawp i nei dawn nia.'(Thuf 20:13)

Kristiante inkaihhraina leh inzirtirna pawimawh tak chu taima tura inzirtir hi a ni. Thufing 20:13-ah chuan, 'mut thlahlel suh, i lo pachhe dah ang e; I mit meng la, tichuan chhang khamkhawp i nei dawn nia,' a ti a. Hei hian min kawhhmuh a tum chu eng ang mi pawh ni ila, tih tur, thawh tawh engemaw chu kan nei theuhva. Mu bo mai mai lova, hna tangkai engemaw tal thawk a nung tur kan ni tih min zirtir a duh a ni.

Hnam leh Sawrkar pawh mahni intodelh lova midang chhawmdawl ngai chu hnam zahawm, sawrkar chak a ni ngailo. Chutiang bawkin mi mal leh chhungkua pawh mahni hawpkhawp la lut lo leh thawkchhuak theilo, peihlo chuan mi zah an phur ngailo. Kristian chu a taima phawt mai tur a ni. Rawngbawlna kawnga zau zawk leh nasa zawk a kan thawh theihna turin mahni intodelh a ngai a . Mahni chauh ni lovin midangte pawh chhawmdawl thei turin taima takin kan thawk reng tur a ni. Mi taima kut chuan hausakna a thlen thin. Mat 10:10-ah chuan, ' hna thawktu chu a ei tur hmu tlak a ni si a,' a ti. Vanglai thachakna leh theihnate hi kan thatchhiat bopui mai mai tur a ni lo. Ringtu inti si, natna leh harsatna dang sawi tur em em nei si lova chhuanchham fo, mi dang chhawmdawl ngai ngawih ngawih chuan taimakna kawngah mahni inenfiahna tur a nei a ni. Tirhkoh Paula chuan Thesolonika mite hnenah, 'tu kut ata mah inchhang kan ei lova, in zingah tumah kan tih hautak lohna turin hah tak leh rim taka thawk chungin kan ei zawk a ni.' a ti. Chu mai ni lovin, 'tupawhin hna a thawh duhloh chuan ei pawh ei suh se,' a ti hmiah mai a ni.(II Theso 3: 8&10)

He thu kan zir hian mahni i in enfiah theuh ang u. Engmah hi a thlawnin a rawn awm ngawt lo. Delhiah hian nu leh pa sum thawhchhuah hmangin lehkhah zir turin tam tak chu kan lokal a. Engemaw chen chu hahdam deuh pawhin kan awm thei a ni mahna. Nimahsela kan thawhrim peih lohva, kan zirlai leh hna dangah pawh hlawhtling khawpa kan zir peihlo a nih ngat chuan, ngai reng rawh, i hmuh phak rengah nang leh i thlahte chu pachhiatnain a nang che anga, i pumpelh tawp lovang. Mihring sum hlu chu taimak hi a ni si a. Thawhchhuah belh zelloh chuan a awmsa hian a daihrei lo khawp mai . Mihausa leh neinung nia kan hriatte pawh hian nitin thawhchhuah belh zel an tum thin.

Hnamfing leh changkang apiang an hmakhawthlir a thui. Belhchian an dawl bawh. Belhchian dawlo zet, changkang anga inggai, changkang nunzia leh awmdan zui peih silo kan tam. Hmalam kum 10 chu sawiloh kumkhat pawh thlir peihlo, mahni phone top up-na tur pawh thawkchhuak lo, mahni hmakhua pawh thlir peihlote pawh kan awm ta nual awm e. Muhar thotlai, maltlata eizawn tur nise hlawhchham ngial ngial tur kan awm nual mai thei.

Chhun khaw eng hi hnathawh nana hmanga, zana chawl hahdam tura duan kan ni. A dik tak chuan zan lama chet velna tura zan mit min pekloh atang hian zan lam hi chu mihringte tan hahchawlhna tura siam chu ni awm tak a ni. DMI tlai lam inkhawm tura lokal, lunch ei tur pawh inggaihtuah hman lova mu rei, inkhawmban thingpui leh a hmeha in hnawhpuar tumte pawh kan awm ni tein an sawi a. A dik a nih ngai chuan sim khuk ral nghal vat chi a ni.

Kristian chu a awmna apiangah mi hmantlak a ni tur a ni. Pianphunga rualban, tha leh ngaihtuahna tluantling nei a siam i nih a, kum lama puitling thawkhat i nih bawh si a, midang pek ve tur chu sawiloh, mahni pawh i in tuamhlawm zolo a nih chuan, ringtu hmantlak ni turin taimak chhuhthar i mamawh a ni ang. Thawk lova ei ringawt, silhfen mawi leh fashion thar hre theifu si i nih chuan, he thupui hian min kaiharh hlawm teh se. DMI member, nula leh tlangvalte chuan mi dang entawntlaka mahni intodelh thei tur khawpin kan hna i thawk theuh ang u.

Paula chuan Tita hnenah, '**kan mite chu tlakchham an neih ngailoh nan hna tangkai thawka inhmang reng turin fuih la, an awm mai mai tur a ni lo,**' tiin a fuih a ni.(Tita 3:14). Hei hi keini DMI memberte pawhin mahni intodelh tura kan in zirtir leh infuihthar nana kan changthlan lo ni ve rawh se.

Sawiho tur:

- 1.Kut dawngdah chuan retheihna a thlen thin a, mi taima kut erawh chuan hausakna a thlen thin tih hi han sawi zau teh u.
- 2.'Thawhrim chu chawlhna nuam a ni' tih a ni a. Thawkrim bawk si chu a chawl thei dawn em ni ? Thawkring chungah chawlhna thuruk awm thu hi han sawi zau teh u.
(Bible chhiar tur: Mat 10:10; Tita 3:14; Thuf 12:27(b) ; II Theso 3:8 &10)

ZIRLAI -8NA : NUPUI PASAL ZAWN:
28.September 2013 (Inrinni)

“Tin, Lalpa Pathian chuan, mihring amah chauhva awm hi a tha love: amah tanpuitu tur a kawppui awm mi ka siamsak teh ang,’ a ti a. ‘Tin, Adama chuan, hei zet chu ka ruh ang ruh nei, ka tisa ang tisa nei ngei chu a ni.”(Gen 2:18,23)

Gen 2:18-25 kan en chuan mihring(mipa) amah chauhva awm chu Pathianin tha a ti lova, a kawppui awm mi(hmeichhia) a siamsak ta a ni tih kan hmu . Adama hi kawppui tur zawnsaktu nei tha ber a ni mai awm e.

Aw le, kan thupui hi Kristiante inzirtir leh inkaihhraina nun atanga sawi tur a nih avangin engtingge nupui pasal kan zawna, kan inzawn zel ang. A tha ber sawi tur a awm kherlo mai thei. DMI memberte chu nula tlangval, zawnglai rual tamna kan ni bawk a, nupui pasal zawngtuten hriat tlan atana tha tlem chu i han umzui dawn teh ang .

Hmel duhzawng: Han en vang vang pawh a tha kan tih zawng nimiahlo chu kan thlang kher awm love. Hmeltha tih zawng, kan phuloh riauva kan hriatte thlengin beiseina chu a awm thin. Hmeltha tih zawng zawn tur a nih chu.

Nungchangtha: Hmeltha var mai chu an nungchang pawh a mawi deuh mai thei. Hmeltha na na na chu a to pawh an to deuh thin chu a nih hi. Nimahsela hmel ringawt um a nupui pasal inzawngten vanglai hmel mawina a lo chuaiin, in iai an tina duh ni tein an sawi thin. Dik tak maw! Nungchang mawi leh hawihhawm, hmeltha bawk site chu an hlu lehzual ang chu.

Beng hmanga zawn: Kawppui tur kan zawnin mit chauhva zawng lovin beng hmang pawhin zawn tel tur a ni an ti a. Kawppui atana kan duh em em mai te kha chu kumkhua(damchung) atana nupa kawpchwai rem taka neih kan duh theuh awm e. A bul tanna tur, kan inzawn tawn vel lai hian kan duh tak mai kha engtingge miin an hmuh leh hriat dante, engang mize nei nge a nih tih leh, kei leh kan chungkaw kawprem thei tur mi a nih chiah em tih te thlir telin, midangin an hmuh leh hriatdan ngaithla telin uluk takin kan zawng tur a ni. Hei hian duhtui lutuk lam a kaw lova, kawppui awm mi thlan fimkhar a tulzia kan sawina a ni.

Nupui pasal in zawnga, induh tawnte chuan inneihthe pawh buatsaih mai tur chu a ni a. Mahse inriahbuk thingfawm chawt mai tur chu a ni lo. Kohhran dan, hnamdan leh kalphungte a awm a nih chuan chu chu ngun taka en a , zah tel chungin inneihna buatsaih tur a ni. Gen 24:50- leh a hnu lam kan en chuan Rebeki pasal neihdan tur chungchangah amah rimtu leh a nu leh pate nen amah rawn chungah mumal taka indawrin, inneihna an buatsaih thu kan hmu. Mitinin mahni kawppui awm mi, mahni milpui, zawlpui deuhthe ngaihchan thiam a ngai a. Mi, a hausak leh neihnun avang emaw ringawt a um ruak ruak ringawt tur a ni lo. In zawn tawnlai hi chu a tlangpuiin zia kan inthup tawn hun a ni a, thutlukna siam fel hmaa inbelhchian hmasak deuh chu a finthlak a ni.

Inneihah khan a tawp mai lova. Inneih hnua nupa nun khan kan inzawn dan leh inneih dan kha a rawn tinghet zel dawn a. After sale service kha a pawimawh tawlh tawlh dawn a ni. IKor 7:1-16-ah chuan nupa awm dan tur chiang tak min kawhhmuh a. Hei hi chhinchhiaha kan zawm theih ang ang zawm kan tum a tha. Joba 31:1&10 kan en chuan, thutiam(thutlukna) wawi khat kan siam tawh chuan kan zawm ngei tur a ni a. Chutianga kan tilo a nih chuan kan kawppui chu midangin tlawm mai rawhse, ti hialin inneih hnu a awm dan turte min kawh hmuh a ni.

Tun laiin duhber thlang inti si, inthen leh mai maite, kawppui nei reng chung a mi dang a ruka kawp tum leh kawp thinte pawh kan lo awm ta zel a. Hei hi Kristiante inkaihruaina kalh tlat a ni . Kan mit atan thu thlung kan siam tawh chuan midang melh kawi a tul tawhlo a ni. Kawppui tur kan zawnin a theih hram chuan Kristian ngei kawppui atan zawnng ila, duhthusamah pheih chuan mahni hnampui (Mizo) ngei neih tum a tha a ni.

Sawizui tur te.

1.Engtingge bengin kawppui tur kan zawn ang.?

2.Nupui pasal zawn thu-ah hian fimkhur lutuk avanga hmuh zawhloh a awm thei ang em?

3.In riahbuk thingfawm chawt chawt loh tur tih hi enge ni ber a kan hriat?

4.Pastorten an inneihtir piah lama, Court Marriage ang chi hi Kristian (Mizo)te tan tul ve rengin kan hria em?

5.Inneih tawh hnua midang beisei leh mai thin hi mahni thutiam bawhchhiatna a ni em? Hemi kawngah hian Kristian tha awm dan tur enge ni ang?

6.Inneihna chungchangah Bible leh Kristiante inzirtirna ding reng chu mipa leh hmeichhe inneihna hi a ni a. Same sex inneihna hi engtia ngaih tur nge ni ang?

(Bible chhiar tur: Gen 24:50; IKor 7:1-16 ; Neh 10:28-30)

ZIRLAI - 9NA-KRISTIAN CHHUNGKAW DIN:

29 September 2013 (Pathianni)

'Kei leh ka chhungte erawh hi zawnngin Lalpa rawng a nia kan bawl dawn ni.'(Joshua 24:15)

Mihring , nu leh pa kristian kara lopiangten nupui pasal innei a chhungkua kan din hian Kristian Chhungkua kan din tiin sawi ta ila, kan tisual tampui awm love. Chutih rual erawh chuan tlema han sawi zui ngai chu a awm thei ang.

Kristian chhungkua chu nu leh pa leh fate kristian, Krista duhzawnga inkaihruaia, mumal taka amah anna kawnga puitling zel tura inzirtir leh in enkwlna chhungkua hi a ni. Heti lo zawnng pawh hian sawifiahdan chu a awm thei ang. Engpawhnise, Kristian Inkaihruaina thupui hnuaia Kristian Chhungkaw din chungchang kan zirhonaah hian nupa kawpchwia lo insiam tawh ten kan in enkawlnaah a chungka kan sawi ang hawiin chhungkua kan ruahman em. Nupui pasal la neilote pawhin kan neih hunah chutiang taka inenkawl leh inkaihruai tur chuan rilru inbuatsaih lawkna fel tak neiin, Kristian chhungkua ti a sawi ngam din turin i inbuatsaih ang u.

Tirkoh Paula chuan, keini zawnng van khua leh tui, Pathian chhungte kan ni si a, a lo ti a. Hei hian min huamtel vein kan inhria em? Joshua chuan chhungkua a Pathian hmaa lan a, a ram tana thawk a, hma lam pan zel chu a thu rolum a ni . 'Kei leh ka chhungte erawh hi zawnngin Lalpa rawng a nia kan bawl dawn ni,'(Joshua 24:15) a tih hian kei chuan kristian chhungkaw din ngei ka tum a tihna tlukah a sawi theih awm e. Khatih lai Israelte nuna hun harsa tak, a nawlpuiin hnamdangte pathian biak mai pawh pawiti lova an kal lai khan, Pathian nung chauh bia a, a rawngbawl tur a chhungkaw humhalhtu, humhalh ngam, Pa, a tawngchhuak a ni. He tawngkam ang hi tunlai hunah hian kan hmang hawh ve ngam ang em tih nu leh pa leh nu leh pa nih la tumte hian mahni i inzawt ang u.

Chhungkaw din chungchangah hian Sam ziaktu chuan, " Lalpa'n in a sak loh chuan a satute chuan an thawk rim thlawn mai a ni (Sam 127:1) a ti a. Kristiante chu Kristian chhungkua ngei din tura inzirtira inkaihruai kan ni a. Chumi tipuitling tura hma kan laknaah chuan mal tan loh tur a ni. Chhung inkhawmte pawh hun remchang kan neih ang zela vawn nuna, thlahthlamloh kan tum hram hram a tha. Pathian biakho ngailohna concrete building tha tak ai chuan Pathian hnena kunho theihna rap in a thlan awm zawk.

Pu Lalhriata chuan,

'Bible thianghlimin a sawi angin,

Hmeichhe fing zawnng chuan run an rem;

Eng ang run nge nang i siam ve le?

Lal Isua nen in tang dun em? a lo ti a.

A hming chawichhan Lal Isua telve remchanlohna chhungkua a nih chuan a fuh thei lovang. Tap turin chhungkua min dinsak lo a ni.

Chhungkaw din tura nupui pasal kan inzawn danah pawh hian a theih hram chuan mahni kristian pui ngei thlan ngam a tha. IIKor 6:14-ah chuan, 'ringlomite nen ruallo taka nghawngkaw/ bat dunin awm suh u' min ti a ni. 'Engahnge pumkhata a siam? Chithlah Pathian ngaihsak a zawng a ni,' (Mal 2:15) Pumkhata kan insiam chhan chu chithlah, Pathian ngaihsak kan hrinchhawn zel hi a ni si a.

Kristian chhungkaw dintheihna tura pawimawh Krista rinna a inngahnghehna tak tak chu Paula hian Timothea a fuihnaah hian a sawi lang a. 'Rinna tak tak nangmaha awm chu ka hre reng si a, chu rinna chu atirin i pi Loisi-ah chuan a awm a, i nu Euniki-ah chuan a awm bawk a, nangmahah pawh a awm tih dik takin ka hria,' tiin (IITim 1:5) Chu rinna, pi leh pu, nu leh pa kal tlanga inpekchhawn zelna chhungkua chu kan mamawh a ni. Khawimaw lai china tha ve tak, tha ziktluak lo a awm theih. Engmi pawh ni ila, eng hna pawh thawk ila, khawihmunah pawh awm ila, Kornelia anga Pathian ngaihsak chhungkua ni tura inbuatsaihin, Kristian Chhungkua i din ang u.

Sawiho turte:

- 1.Kristian chhungkua, thlaraubo veilo a awm theih ang em?
 - 2.Nupui pasal innei lovin kristian chhungkua a din ve theih tho ang em?
 - 3.Kristian chhungkaw awmdan tur ni a kan hriatte i sawiho ang u.
- (Bible chhiar tur: Joshua 24:14-18; Sam 127 :1;Mal 2:15; T.T.10:1,2; IITim 1:5)